

**Date – 06/05/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. May ni 1 atanga Mizoram leh Myanmar inkar ramri khar tur tia thuthang chu a taka kenkawh a ni lo.**
- 2. April thla bul atanga to thli tleh, rial nasa tak tla leh ruah sur avang khan tun thlengin Mizoramah in 1,400 ai a tlem lo a chhe tawh.**
- 3. Lok Sabha inthlanpui thawthumna atana campaign hun chu nimin tlai khan a tawp a. Naktuk ah vote thlak a ni ang.**
- 4. Nimin khan rampumah NEET Undergraduate medical entrance exam buatsaih a ni**



**BORDER CLOSURE**

**May ni 1 atanga Mizoram leh Myanmar inkar ramri khar tur tia thuthang chu a taka kenkawh a ni lova, ramri-ah intlawhpawh zui zel a ni.**

**Home department hotute chuan tun hnai khan Assam Rifles leh Subsidiary Intelligence Bureau (SIB) thuneitute kovin hemi chungchang hi an sawipui a. A tira Champhai district VC leh YMA hruaitute bakah Myanmar ramri depa awm khaw engemawzat khawtlang hruaitute hnena May ni 1-a ramri khar a nih tur thu an lo hrih tawh chu a taka kaltlangpui turin Ministry of Home Affairs atangin thupek an hmu lo ni a hriat a ni a. Chutiang thupek chu phawrh tur an nei bawh lo niin Home department hotute chuan an sawi a. Home department hotute chuan Mizoram chu India hmarchhak state zinga hel pawl nei lo leh muanawm ber a nih avangin sorkar leh district thuneitute hriatpui lohva mipui tiralkhel zawnga khawtlang hruaitute kokhawm tawh lo turin an hriattir bawh a ni.**

**Hetih lai hian Ministry of Home Affairs chuan ramri a inkalpawh phalna ‘Free Movement Regime’ an tih mai hi tihtawp (suspend) a nih tawh thu an puang niin chanchinbu thenkhat chuan an ziak a. Mahse, Mizoram leh Nagaland-ah chuan tun thlengin a taka kalpui a la ni lo a ni.**



**MYANMAR REFUGEES**

**Tun hnai-ah khan Myanmar ram Chin state a Paletwa bial atangin raltlan 40 chuang chu Lawngtlai district-a Hruitezawl khua-ah an lo luh belh ni a thudawn a ni.**

Intelligence lam atanga thu dawn danin Myanmar a Rakhine state leh Chin state a awm hel pawl lian ber Arakan Army chuan Paletwa khawpui (township) an sipai atan thalaite tihluhna a zawm turin an ti a. Tahan Post-in a ziah danin April ni 30, chawhnu khan AA-a tel duh lo hmeichhiate telin mi 40 chuang an rawn thleng a, a tuk May ni 1 khan hmeichhe 7 an thlen belh leh a, kum 30 mi deuh vek an ni a, AA-ten sipai training tur an tih vanga rawn flanchhia te an ni, tiin raltlan tanpuitu zinga thuneitu pakhat chuan a sawi a ni. Mizoram sorkar thuneitu lam chuan raltlan lo luh belh thu hi an la hriat loh thu an sawi ve thung.

Sorkarin a chhinchhiah dan chuan kar kalta Thawhtanni (April ni 29) thleng khan Mizoramah Myanmar raltlan 34,282 an awm a, an zinga mi 15,938 te hi relief camp hrang hrang 147-ah an awm mek a. Mi 18,344 te erawh chuan an chungte leh thiante an belh bakah engemawzat chu mi in luaha khawsa te, an hnathawhna hmuna awm chilhte an ni a. Tun dinhmunah raltlante hi mi 10,899 chu hmeichhia an ni a, mipa 10,073 leh naupang 13,310 an awm bawk. Khawzawl, Kolasib, Saitual leh Serchhip district-ah te relief camp sak a ni lova, district dang 7-ah chuan relief camp a awm vek a ni. Siaha district chu relief camp tamna ber a ni na a; mi 3,888 chauh an awm a, a dawttu Lawngtlai district-a relief camp 36-ah mi 3,519 an awm. Champhai district, relief camp 23 awmnaah, mi 6,346 zet an awm thung a. Champhai district-ah hian Myanmar raltlan an awm tam ber a, an vaiin mi 14,499 an awm a. Siaha district-in dawtin mi 6,044 an awm a, mi 5,864 awmna Lawngtlai district-in a dawt leh a ni. Zokhawthar relief camp-ah raltlan an awm tam ber a, mi 3,290 zet an awm a, Farkawn khua-a relief camp-ah mi 1,426 an awm bawk.



#### DISASTER

April thla bul atanga to thli tleh, rial nasa tak tla leh ruah sur avang khan tun thlengin Mizoramah in 1,400 ai a tlem lo a chhe tawh a, a then chu luah tlak loh khawpa chhia a ni.

Rial tla, thlipui leh ruahsur-in a tihchhiat hi kar kal ta Ningani hma zawng kha chuan Mizoram hmar chan lama district 4 chauhah a ni a. Ningani khan chhim chan lamah ruah a sur ve tan chauh a ni. Chhiatna thleng hi dawn belh zel a ni a. Ningani (May ni 2) khan rial tla, thlipui tleh leh ruah surin Mizoram district 10-ah chhiatna nasa tak thlenin in 580 ai a tlem lo a tichhia ni-in thu dawn a ni a. Khawzawl district-ah in 128 a tichhia a. Khawzawl district-ah hian Sialhawk khua-ah in 68 rialin a deng chhia a, chumi zinga in 5-te chu luah zui tlak loh a ni a. Tlangpui khua-ah pawh in 55 rialin a deng chhia a ni. Sialhawk khua hi lakhuihthei leh serthlum thar tam khua an ni a, an lakhuihthei leh serthlum a deng chhe nasa hle a. Khawtlang hruaitute chuan kuminah thei an thar tam thei dawn lo niin an sawi a ni.

Lawngtlai district pumpui-ah in 209 vel a chhia niin Lawngtlai a kan Corr chuan a sawi a. Lawngtlai distric thenawm Siaha district-ah chuan in 69 a chhia a, Aizawl district-ah pawh in 40 a chhia a ni. Mamit district-ah in 29 a chhia a. Saitual district-a Ningani (May ni 2) chhawhnu lama thli, ruah leh rial rawn thawk avang khan N. Khawlek khua chuan chhiatna nasa tak an tawk a. Rial tla hian inchung rangva a deng chhe nasa hle a. Rial tla hi artui ai pawh a lian zawk a ni tlangpui hlawm. Inchung 90 chuang deng pawpin in 5 chu luah zui tlak lohvin a dengchhia a, in chung zawng thlak vek ngaiin a awm. Inchung

zatve vel thlak ngai hi in 40 bawr vel an awm a. In chhe nasa lutuk lo, thlak neuh neuh ngai tur chi hi in 50 vel an awm bawk a ni.

Zirtawpni khan N. Khawlek khawtlang chuan hnatlangin chhiat tawk te inchung thawm that hnatlang hi a theih ang angin an thawk a. Nimin khan khawtlangin hnatlang hi an huaihawt chhunzawm a, In tin atangin a pachhuakin hnatlang hi koh a ni. Champhai district-ah pawh rial tla leh thli tleh hian chhiatna nasa vak lo chu a thlen a ni.

Ningani-a thli leh rial thawkin Lawngtlai District chhunga Hmawngbu leh Tuithumhnar khuaa chenna in a tihchhiatte chu nimin khan Lawngtlai District Bawrhsap Pu Cheemala Siva Gopal Reddy chuan a hmunah tlawhin a enfiah.

Lawngtlai Bawrhsap hi Lawngtlai District SP Pu R. Lokeshwaran, Election Officer Pu Denny Lalchhuanawma, Lawngtlai Block Development Officer Pu Collin Hlychho, DIPRO Pu C. Lalhruaitluanga leh chanchinbu mite'n an tawiawm a. Village Council leh tlawmngai pawl hruaitute nen thli leh rialin chenna in a tihchhiatte chu a hmunah tlawhin, thawm that dan tur ruahmannate an sawi ho va. Bawrhsap chuan thli leh rialin chenna in a tihchhiatte chu sawrkar atanga chhawmdawlina leh tanpuina awm thei angte ngaihtuahsak an nih tur thu a sawi a. Rialin an in chung rangva a den chhiatte hnenah a nih tur anga tanpuina pek theih hmaa an lo khuh lailawk na'n silpauline a hlan nghal bawk a ni.

Hriat theih chinah Ningani a thli leh rialin chenna in a tihchhiat hi Lawngtlai District-ah 209 awmin, chu'ng zinga 62 chu ralhlante chenna in/buk a ni a. Khaw malkhaia in chhia tamna ber chu Tuithumhnar niin, chenna in 76 (ralhlan in 18 telin) a chhia a. Chamdur P-I-ah in 25, Vawmbuk-II-ah in 24, Vathuampuiaah ralhlan chenna in 21, Hmawngbu-ah in 12, Lunghaukaah in 10 leh khaw dang pariatah belh khawmin in 41 a chhe bawk.

Lawngtlai District Disaster Management Authority (DDMA) atangin thli leh rial vanga chenna in chhiat dan hi DM&R Department-ah preliminary report thawn tawh a ni a. A chhiat dan dinhmun kimchang nen report thawn leh tur niin, a in chhiat dan azirin sawrkar atangin chhawmdawlina leh tanpuina hi pek tura ruahman a ni.

Thli tleh leh ruah sur hian kawlpheha semna hrui engemawzat hmun hrang hrang a tihchhiat bakah kawngpui engemaw zat chu leimin avangin lirthei kaltlang theih lohvin a awm bawk a ni.

<><><>

LOK SABHA

Lok Sabha inthlanpui thawhthumna atana campaign hun chu nimin tlai khan a tawp a. Naktuk ah vote thlak a ni ang. Inthlan thawh tumnaah hian State leh Union Territory 10 huamchhunga Lok Sabha bial 93 ah vote thlak a ni ang.

Naktuk vek hian Lok Sabha inthlan thawh sarina leh a hnuhung ber atana hriattirna tihchhuah a ni dawn bawk a. Inthlan thawhsarihnaah hian Lok Sabha seat 57 ah inthlan a ni dawn a. State pasarih leh Union territory pakhat huamchhungah inthlan buatsaih a ni ang.

Inthlan thawhsarihnaa seat 13 hi Uttar Pradesh leh Punjab atangin a ni a, West Bengal ah pakua, Bihar ah pariat, Odisha ah paruk, Himachal Pradesh ah pali, Jharkhand ah pathum leh Chandigarh Union Territory ah pakhat a ni a. Inthlan chuh tumte tan nomination hi tun thla ni 14 thleng thehluh theih a ni a, June ni 1 ah vote thlak a ni ang.

<><><>

## NEET UG

Nimin khan rampumah NEET Undergraduate medical entrance exam buatsaih a ni. National Testing Agency chuan medical lama zirna hrang hranga luh theihna tur entrance exam hi a kumtin a buatsaih thin a. Kuminah hian exam tur zirlai nuai 24 chuang awmin ramchhungah exam centre hi khawpui 557 ah siam a ni a, hei bakah hian rampawna khawpui 14 ah exam centre hi siam a ni bawk.

<><><>

## BENGALURU

Bengaluru-a ei inna Rameshwaram café-a bomb tihpuaha a mawhphurtu berte man an ni tih National Investigation Agency (NIA)-in nimin khan an sawi a, an mi zawn lai 2, Abdul Matheen Taha leh Mussavir Hussaib Shazeb-a te hi Kolkata bula an bihrukna hmun atangin NIA team-in an man tih an sawi a ni.

Lu man cheng nuai 10 ve ve nei lai, Mussavir Hussain Shazib-a hi café chhunga tualchher bomb kamtu-ah puh a ni a, Abdul Matheen Taha hi remruattu berah puh a ni thung a, inhnamnawaha puh dang pakhat chu March ni 26 khan man a lo ni tawh a ni.

<><><>